



*Le Saint Esprit enuoyé du Ciel descend sur les Apostres & Disciples
le iour de la Pentecoste.*

QVAND Iesus fut monté au Ciel, les Apostres s'en retournerent en Ierusalem, & demeurèrent tous ensemble, perseuerans d'un accord en Oraison, avec les femmes & la Vierge Marie mere de Iesus, & ils eleurent par sort Matthias, pour estre Apostre au lieu de Iudas le traistre; & quand le iour de la Pentecoste fut venu, ils estoient tous ensemble en un mesme lieu. Lors soudain il se fit un son du Ciel, comme d'un vent qui souffle en vehemence, lequel remplit toute la maison où ils estoient assis, & leur apparurent des langues departies comme de feu, & se posa sur un chacun d'eux. Et tous furent remplis du S. Esprit, & commencerent à parler diuers langages, ainsi que le S. Esprit leur donnoit la grace de parler. Or y auoit-il des Iuifs sejourrans en Ierusalem, hommes craignans Dieu, de toute nation qui est sous le Ciel. Apres donc que le bruit en fut épars, vne multitude s'assembla, laquelle demeura toute estonnée, parce qu'un chacun l'oyoit parler en son propre langage: Dont ils estoient tous émerueillez, & disoient, Voicy tous ceux-cy qui parlent, sont-ils pas Galiléens? Comment donc chacun de nous les oyons nous parler en nostre propre langage auquel nous sommes nés, & dire choses magnifiques de Dieu.

Actes des Apostres Chap. 1. & 2.